



Vischnaunca
Tujetsch

Protocol dalla 15. radunonza da vischnaunca

dils 22 d'avrel 2026

allas 19.00 uras en Sala Cristalla a Sedrun

**Protocol nr. 15 dalla radunonza da vischnaunca dils 22 d'avrel 2026
allas 19.00 entochen allas 20.53 ella Sala Cristalla a Sedrun**

Presidi: Martin Cavegn (president communal)

Protocollista: Larissa Berther (assistenta direcziun)

Dumbravuschs: Silvio Schmid (president dalla cumissiun da gestiun)
Maurin Cavegn (commember dalla cumissiun da gestiun)

Presents: 30

Perstgisas: Daniel Schmid (gerau)
Reto Schmid (commember dalla cumissiun da gestiun)

Tractandas:

1. Beinvegni e constataziuns
2. Approbaziun dil regulativ da pasculaziun cumina
3. Approbaziun dalla nova lescha davart l'utilisaziun intensiva da terren public a cuorta ed a liunga vesta
4. Orientaziuns
5. Varia

Tractanda 1 Beinvegni e constataziuns

Il president communal fa in cordial beinvegni a tuttas convischinas e tuts convischins sco era als commembers dalla cumissiun da gestiun tier la 15-avla radunonza da vischnaunca dil trienni 2023-2026.

Tractanda 2 Approbaziun dil regulativ da pasculaziun cumina

Il president communal pren il plaid e declara ch'il regulativ da pasculaziun cumina datava digl onn 1999 ed ei seigi stau uras da surluvrar quel ed adattar quel al temps hodiern. Quell'incarica hagi la geraua dil departament cumpetent exequiu en collaboraziun culla suprastanza dall'Uniun purila Tujetsch. Rodund 10 artechels dil regulativ veder ein u vegni adattai ni strihai cupleinamein. Il president communal desista dad ir atras mintga singul artechel dil regulativ e fa la proposta dad ir ella debatta d'entrada cun far attents che la geraua cumpetenta sappi dar sclariment en cass da damondas.

Debatta d'entrada:

Quater convischins e convischinas s'expriman ella debatta d'entrada tier il regulativ da pasculaziun cumina.

Gl'empren ei vegniu fatg la damonda davart la determinaziun dil plaid: pur tuatschin. La geraua declara ch'ei setracti da purs che seigien domiciliai en Tujetsch ed hagian cheu lur menaschi puril. Plinavon declara ella ch'ins stoppi differenziar denter purs cun menaschis purils e persunas che possedien aviuls, gaglinam e cavals, ils quals seigien zuar en possess d'ina numera da TVD (Tierverkehrsdatenbank) e stoppien medemamein annunziar lur animals, mo tuttina vali lezza tenientscha d'animals sco hobi.

Ina convischina ei dil meini che purs che seigien secasai ordeifer la vischnaunca da Tujetsch duein medemamein haver il dretg da guder pastira. Per quei motiv fa ella la proposta d'amplificar igl artechel 6 dil niev regulativ da pasculaziun cumina ch'el senumni niev aschia: *Mintga menaschi puril cun ina numera da menaschi official (Betriebsnummer) e che tegn ses animals sur gl'entir onn en Tujetsch ha il dretg da guder pastiras – era sch'el ei buca domiciliaus en vischnaunca.*

La geraua ei dall'opiniun che quei dretg duei restar resalvaus pils purs cun domicil civil en nossa vischnaunca, ils quals paghien taglia en Tujetsch.

In ulteriur convischin parta quei meini ed amplifichescha ch'ils purs cun domicil civil en Tujetsch s'engaschien per l'uniun purila e tgirien quellas pastiras – tgei che seigi ina ferma petga ed in grond sustegn dalla vischnaunca. Era el ei dil meini da buc sustener la proposta dalla convischina.

Il president communal supplichescha la radunonza da vischnaunca dar giu lur vuschs.

La radunonza da vischnaunca decida cun 11 vuschs gie 17 vuschs na ed 2 abstenziuns da resalvar il dretg da guder pastiras sulettamein pils purs cun domicil civil en Tujetsch.

La proposta dalla convischina ei cheutras renviada.

La convischina fa ina secunda proposta, numnadamein da mantener igl artechel 22 dil regulativ veder, il qual prescriba il suandont:

Art. 22 Contribuziuns (1999): *La vischnaunca promova la cultivaziun gudida dallas pastiras cun reparter las contribuziuns federalas e cantunalas tenor la lescha. Il cau d'agricultura controllescha che talas a disposiziuns per la vischnaunca vegnien applicadas el dretg senn.*

En connex culla revisiun dil regulativ era vegniu decidiu da surdar quell'incarica all'Uniun purila Tujetsch. Per l'ina vegni quei gia praticau daditg aschia e quei sistem funcziuni bein. In convischin fa la remarca che l'uniun purila seigi habla d'exequir quella lavur. Ei fussi in'ortgadat da surdar quell'incarica ad inA colluvrerA dall'administraziun communal, damai che gliez vegnessi la finala pli car che da far sezs quella lavur.

Il president communal amplifichescha ch'ils purs hagian in grond scazi da savida ed entras ina evtl. midada da persunal tier l'administraziun communal, fuss ei plitost da discusseglia da puspei surdar quell'incumbensa alla vischnaunca.

Il president supplichescha ils dumbravuschs da rimnar ils votums per la proposta dalla convischina.

La radunonza da vischnaunca decida cun 2 vuschs gie, 24 vuschs na e 4 abstenziuns da buca mantener igl artechel 22 dil regulativ da pasculaziun veder (1999).

Aschia supplichescha il president communal d'ir vi tier la votaziun finala da quella fatschenta.

Votaziun

La radunonza da vischnaunca ha approbau cun 27 vuschs gie e 2 vuschs na il niev regulativ da pasculaziun cumina.

Tractanda 3

Approbaziun dalla nova lescha davart l'utilisaziun intensiva da terren public a cuorta ed a liunga vesta

Il president communal pren il plaid e declara als convischins ed allas convischinas la situaziun actuala culla problematica che schai avon maun. Aschia detti ei adina puspei discussiuns davart igl agir en connex cull'utilisaziun da terren communal. La suprastanza communal examineschi mintga cass individual duront lur sedutas. Ei seigi denton buca sempel da tractar tuts tuttina, damai ch'ina basa legala maunchi. Per quei motiv e sin giavisch dil pievel hagi la suprastanza communal decidiu d'elavurar ina lescha che regleschi l'utilisaziun intensiva da terren public a cuorta ed a liunga vesta.

Ei detti adina puspei reclamaziuns da purs che stoppien clauder ora tegias da mises – tgei che fuss atgnamein l'incarica dil possessur dil mises. In'autra problematica seigien ils plazzals da lavur. Per part seigi terren public occupaus sur meins ora cun containers e tschaghegnas d'interpresas da baghegiar. Tier las tegias da mises vegni il contuorn savens utilisaus sco piazza da seser cun measas e fueinas francadas, schegie ch'ei setracti da terren public che surveschi agl intent da vegnir nezegiaus sco pastira.

Culla lescha lessien ins crear ina basa legala pils cass individuals, la quala duei contonscher in uorden e possibilitar da tractar gestamein tut las persunas che vulan utilisar intensivamein terren public a cuorta, mo era a liunga vesta.

Debatta d'entrada:

Tschun convischins e convischinas prendan il plaid.

In convischin sedamonda schebein la lescha davart l'utilisaziun intensiva da terren public a cuorta ed a liunga vesta seigi propi necessaria e visescha vi sin pliras dissonanzas e malmadirezias enteifer la lescha. Enorm paucas vischnauncas disponien d'ina tala lescha e cun quella vegni ei buc creau la basa legala. La vischnaunca sappi reglar l'utilisaziun da terren public culla pratica d'administraziun (Verwaltungsgebühr).

Il president communal explichescha vinavon che tut quei che basegni ina concessiun seigi buc suttamess a questa lescha.

Medemamein art. 3 dall'ordinaziun tier la lescha vegni ei discurriu da plazz da seser avon mises cun ina surfatscha da 50m². Tenor las prescripziuns dil cantun seigien plazz da seser avon tegias da mises lubidas sin ina surfatscha da max. 15m². Quei seigi ina cuntradicziun e muossi che quella lescha seigi buc vegni elavurada culla precauziun duida.

Il convischin fa la proposta da returnar la fatschenta alla suprastanza communal per surluvrar la lescha.

In ulteriur convischin pren il plaid e declara ch'el sappi sustener la proposta da siu convischin. El ei dil meini ch'ils purs cueschien buc als possessurs da mises lur plazs da seser avon tegia. Plinavon manegia el che quei decurascheschi e gidi buca da trer neutier nova glied sch'ins astgi gnanc pli utilisar il plaz avon la tegia da mises. Ins creeschi grevezias per possessurs da mises e tenor el hagien ils purs pastira en abundanza. Sin fundament la sias ponderaziuns fa el la proposta da strihar questa lescha dil tuttatg.

Il tierz convischin ei dil meini ch'ins augmenti las lavurs administrativas cull'approbaziun da questa lescha, schegie ch'ei fussi da baghegiar giu lavur en quei sector. En caussa tegias da mises muossa convischin treis capientscha. Leu vesa el il basegns d'in manual per reglar il diever dil terren public.

El numna denton plirs exempels, daco ch'el ei encunter da reglar l'utilisaziun da terren public a cuorta vesta, cunzun tier occurrenzas sportivas ni culturalas. Aschia eis el dil meini ch'ei seigi in'ortgadat da stuer dumandar la suprastanza communal per ina lubientscha sch'el vegli ir cun sia famiglia en Val Maighels e barsar ligiongias sin in fiug aviert. Il president communal intervegn e di che quei dependi dall'applicaziun dalla lescha. Secapescha ch'ins stoppi far la differenza denter in pign fiug per barsar ina ligiongia ni sch'ei setracti d'in grond fiug.

Convischin quater depona ses cunterarguments tier las remarclas dils convischins ch'ei s'explicai precedentamein. El hagi l'impressiun che biars scumbeglien ina lubientscha da baghegiar cull'utilisaziun da terren public. El fa surasenn ch'ei pudessi caschunar aults cuosts per la vischnaunca sch'ei dessi protestas che vegnessen tratgas vinavon entochen dertgira e che l'applicaziun da questa lescha engrevegiass buc l'utilisaziun dil terren public – ella levgiass anzi il qual, damai ch'ins stoppi gia ussa dumandar per lubientscha sch'ins vegli far diever da terren public. Plinavon stuess la vischnaunca far controllas tier tut las tegias da mises sch'ei dessi cass da dertgira e quei caschunass lavur administrativa e cuosts supplementars.

Convischin tschun pren il plaid e regorda ch'ei seigi stau publicau avon 4, 5 onns ella Tuatschina in'informaziun ch'ei vegni fatg controllas tier las tegias da mises. Suenter hagien ins mai pli udiu enzatgei damai che la vischnaunca seigi memia marscha da metter entuorn las mesiras resp. da far las controllas. El fa attents che la vischnaunca s'obligheschi d'exequir las controllas sche leschas vegnien approbadas – buca mo tier tgisas. Per quels motivs propona convischin tschun da returnar la fatschenta alla suprastanza communal. Lezza duei surluvrar e simplificar la lescha avon maun.

Il president communal pren encunter las propostas dils convischins e supplichescha ils dumbravuschs da far las votaziuns.

Igl emprem vegn fatg la votaziun davart la proposta da returnar la fatschenta cull'incumbensa da surluvrar la lescha.

Votaziun:

La radunonza da vischnaunca decida cun 9 vuschs gie e 18 vuschs na da buca sustener quella proposta.

Silsuenter vegn fatg la votaziun dalla proposta da returnar la fatschenta e da buca pli persecutar vinavon ina lescha davart l'utilisaziun da terren public.

Votaziun:

La radunonza da vischnaunca decida cun 7 vuschs gie e 23 vuschs na da buca sustener quella proposta.

Sin fundament da questas duas votaziuns ei vegniu decidiu d'entrar ella fatschenta.

Muort il temps avanzau ha la radunonza da vischnaunca decidiu unanimamein da tractar la lescha davart l'utilisaziun intensiva da terren public a cuorta ed a liunga vesta a caschun d'ina proxima radunonza da vischnaunca.

Il president communal sa s'accordar cun questa decisiun. El senta ch'il desideri per ina sligiazion seigi avon maun.

Tractanda 4 Orientaziuns

Il genau dil departament baghegiar, forestalessen ed ambient pren il plaid ed informescha che las lavurs vid la Via Valtgeva hagian entschiet. La Viafier Matterhorn Gotthard havevi decidiu da far lavurs vid ils fundaments, mo quei han els ussa sistiu e decidiu da far quei ensemen culla sanaziun dalla staziun igl onn 2028/29/30. Quei munta ch'ils maletgs (graffitis) restien pil mument vinavon vid las preits dil sutpassadi.

Tractanda 5 Varia

Treis convischins prendan il plaid.

In convischin pren il plaid el num d'ina gruppaziun da pliras persunas ch'ei semessas ensemen per inoltrar in'iniziativa per reactivar resp. per reintrodur il cussegl da vischnaunca a Tujetsch, il qual era vegniu abolius igl onn 2023 cull'entrada en vigur dalla nova costituziun communal. L'iniziativa ei vegnida dada giu al president communal. Lez declara che quell'iniziativa vegni tractada en suprastanza communal ton pli spert.

Il medem convischin tschenta ina damonda en connex cul project dalla Scola Sedrun. Dil genau competent vul el saver schebein il scriver ora lavurs da planisaziun seigi succediu a moda

correcta e sch'ils dretgs da submittiun seigien vegni teni en. El vul saver co las lavurs seigien vegnidas screttas ora, tgi che hagi survegniu las lavurs e per tgei summa che las lavurs seigien vegnidas surdadas. Plinavon vul es saver sch'ei setracti d'in project da baghegiar ni d'in project da submittiun, d'in project d'execuziun ni d'in BAB.

Il gerau dil departament pren posiziun e declara ch'il project che vegni planisau dil biro d'architectura incaricau, vegni sulettamein utilisau per saver inoltrar la damonda da baghegiar. En quei project ein biars planisaders involvai – denter auter era indigens. Oriundamein vulevan ins far il project en etappas; gl'emprem la scola e lu la sala da gimnastica. Ils plans ein aunc buc avon maun, denton en elaboraziun. Entochen ils 18 da matg 2026 ston ils plans esser semtgai ensemen culs cuosts da project (ca. +/- 10%) per saver tractar la fatschenta a caschun dalla radunonza da vischnaunca dils 24 da zercladur 2026. Lu decida la radunonza davart la cuntinuaziun dil project sco tal culs cuosts ed il credit. Priu il cass che la fatschenta vegness sistida ni dada anavos alla suprastanza communal, lu vegn il project davart la sanaziun dalla scola populara buca pli persequitau vinavon. Sch'il pievel havess d'approbar la fatschenta, lu vegnessen las lavurs d'execuziun aunc inaga screttas ora. En connex culla damonda davart la submittiun declara el ch'ins hagi survegniu silmeins duas offertas. Il convischin interrompa e damonda tgei procedura ch'ins hagi applicau; ina procedura d'introducziun, ina procedura aviarta, ina procedura directa ni ina prequalificaziun? Il gerau rispunda che quei seigi stau ina qualificaziun puntuada e ch'ils acts seigien avon maun. Il convischin vul prender envesta e declara ch'el vegni a s'annunziar tiel gerau cumpetent.

In ulteriur convischin declara ch'el fetschi quitaus pigl avegnir da nossa vischnaunca e pretenda rispostas en connex cul resort a Dieni. A caschun dalla davosa radunonza da vischnaunca hagi il president communal sincerau da tschercar il discuors cun Samih Sawiris.

Il president communal pren posiziun e declara ch'el hagi giu contact cul CEO dall'ASA, Raphael Krucker. Lez hagi confirmau ch'il termin cun Samih Sawiris hagi stuiu vegnir stuschaus. Il president communal capescha ch'il pievel vegli haver rispostas, mo tuts stoppien uss haver pazienza. Nus seigien buc ella dretga posiziun per far squetsch als responsabels.

Il tierz convischin depona ina reclamaziun. Silla piazza da deposit sur Claus che vegni utilisada da pliras firmas da baghegiar (ARGE Kieswerk) seigien gronds crests da sablun, ils quals caschunien ina nundetga purlanza. Igl auto ed ils sems finiastra seigien adina da puorla ed era enviers ils hosps da stad seigi quei buca gest ina buna reclama. Schebein il president communal sco era il gerau cumpetent muossan capientscha per la situaziun dil convischin e sincereschan ch'els vegnien a sclarir tgei ch'ins savessi far en quei grau.

Il president communal engrazia per la presenza, la participaziun e la confidanza. El siara la radunonza da vischnaunca allas 20.53 uras e giavischa in bien retuorn a casa.

Protocollista:
Larissa Berther

President communal:
Martin Cavegn